

Un Reto na Esnan cu ta Kere cu Masoneria ta un Organizacion Diabolico

Skirbi pa Clyde Harms



E destruccion di e monumento di Masoneria di Aruba siman pasa a genera basta publicidad. Ami a kere cu nos pueblo, respetuoso di propiedad priva ahenos, lo laga nan bos resona condenando e vandalismo bergonzoso di algun miembro di nos comunidad. Mi a keda desapunta. Mi no a tende ningun lider politico, religioso, comercial of cultural, expresa publicamente nan indignacion pa e acto vil aki. Den un noticiario digital tabatin hopi comentario di lesadornan, pero pa mi desengaño, mayoria tabata pa aplaudi loke algun a yama "un bon trabao," conectando e acto vulgar di e malandronan cu slogan di un partido politico cu si a haci un bon trabao segun e pueblo cu a dun'e un victoria aplastante.

Ami ta un Mason. Mi ta harta di tende of lesa cu Masoneria ta un organizacion diabolico of satanico. Esnan cu conoce mi sa cu ami hamas a join un organizacion cu no ta mantene su mes na e balornan di mi y di nos isla. Mi ta spera cu e articulo aki lo aclarea e mal entendimento cu ta bruha algun miembro di nos comunidad. Na esnan cu ta sigui pretende cu Masoneria ta diabolico of satanico, mi ta retanan pa trece prueba di djies un acto diabolico of satanico cu un logia masonico aki na Aruba por a comete desde cu Masoneria a drenta Aruba 94 aña pasa.

Ironicamente, algun di esnan cu a comenta den e corant digital ta acusa Masoneria di traha den secrecia mientras cu nan mes ta sconde tras di un nomber ficticio. Masonnan no ta traha den secrecia. Tur logia aki na Aruba tin borchu cu ta identifica nan mes. Na aña 2005 Logia El Sol Naciente a cumpli 85 aña di existencia y e miembronan a marcha den dia cla te na e monumento Masonico na LG Smith Boulevard caminda varios a tene discurso pa tur hende tende. Por cierto ami a skirbi un articulo cu a sali riba dos pagina di e corantnan local, na Ingles y Papiamentu. Ki ora cu tin un entierro na Cementerio Acacia, centenares di ruman ta congrega na e lugar, bisti orguyosamente

cu nan delantal pa tur hende mira y hendenan cu no ta Mason tambe por ta presente.

Masonnan semper a lucha contra dictadura, inhusticia y sufrimento. Mayoria di e firmantenan di e Declaracion di Independencia di Merca, incluyendo George Washington, tabata Mason. Mayoria di a heroenan Venezolano dera den Panteón di Caracas tabata Mason. Martí, Libertador di Cuba, San Martín di Argentina y O'Higgins Libertador di Chile tabata Mason. E famoso escritor Hulandes Edward Douwes Dekker a skirbi e buki Max Havelaar pa protesta contra e abusonon y inhusticia di e colonialistanan Hulandes na loke awe ta Indonesie. Wolfgang Amadeus Mozart a skirbi "Die Zauberflöte" (E Fluit Magico) como protesta contra e persecucionnan di e Emperatriz Marie Therese di Austria. Lidernan di e Revolucion Frances a abraza e idealnan politico di e escritor Mason Jean-Jacques Rousseau. Henry Dunant a inspira e fundacion di Cruz Cora Interna-

cional pa combati sufrimento di e victimanan di guerra.

Hopi homber famoso di tur parti di mundo ta, of tabata, Mason. John Glenn, e prome Americano a bay den orbita ta un Mason, mescos cu Edwin "Buzz" Aldrin kende, huntu cu Neil Armstrong, tabata e prome dos hendenan cu a cana riba luna. Ludwig von Beethoven y hopi otro musiconan famoso den ultimo siglonan, di Sibelius te "Satchmo" Armstrong tabata Mason. Den arte, literatura, deporte, ciencia, negoshi, medicina, politica, gobierno, ehercito, realmente den tur faceta di esfuersonan humano, Masonnan a haci un diferencia. Na Aruba tambe Masonnan a distingui nan mes y gana respet y admiracion den comunidad pa nan trabao meritario y pa nan liderazgo den comunidad. Hopi Mason a worde reconoci y honra pa gruponan civico, cultural y deportivo. Reina di Hulanda a yega di condecora mas di shen Mason na Aruba den Orde di Oranje Nassau. Actualmente ainda tin por lo menos diesdos Mason na bida cu a yega di worde condecora.

Un di e principianan di Masoneria ta caridad pa cu esnan cu tin necesidad. Na Merca masoneria ta contribui e equivalente di mas o menos cuatro milyon Dollar pa dia, si, pa dia! E placa aki ta bay especialmente pa cuida medico gratis na 19 hospital di kemadura (Burn Institute) y 3 hospital pa muchanan mutila (Crippled Children) na diferente parti di Merca. Aki na Aruba un logia ta yuda esnan den necesidad, especialmente muchanan; esaki si, anonimamente.

E monumento Masonico cu e malandronan a destrui a worde devela na 1990 como parti di e celebracion di 70 aña di El Sol Naciente y ta dedica na L.J.M.



"Nadi" Henriquez, e prome venerable maestro. Tambe tin dos statua di Mason na Aruba. Uno ta di Lloyd G. Smith dilanti di Cas di Cultura. E ruman Lloyd tabata miembro di El Sol Naciente pa hopi aña y tabata un di e fundadornan di Logia King Solomon. E otro statua Masonico ta di e Mason mas famoso di Zuid Amerika; E homber monta riba cabay dilanti di Sociedad Bolivariana: General Simon

Bolívar.

Riba e potretnan por mira e monumento masonico cu desconocinan a destrui siman pasa. (Foto di archivo). Tur Logia masonico na Aruba ta identifica nan mes, nan no ta traha den secrecia.

Manda bo comentarionan cu bo nomber (no seudonimo!), pa clydeharms@yahoo.com.